

共同經課 - 1 出埃及記三十四章二十九節~三十五節

29 摩西落西奈山 ê 時，伊 ê 手 thèh 兩塊約碑，伊落山 ê 時，伊 ê 面，因為耶和華 kap 伊講話，就射出光，摩西家己 m̄知。30 亞倫 kap 以色列眾人看見摩西 ê 時，看 ah，伊 ê 面射出光；in 就驚，m̄敢 oá 近伊。31 摩西叫 in 來，亞倫 kap 會中 chiah-ê 頭人就 lóng tò-tng 到伊 hia；摩西就 kap in 講話。32 然後以色列眾人 lóng 進前來；伊就將耶和華 tī 西奈山 kap 伊所講一切 ê 話，lóng 吩咐 in。33 摩西 kap in 講話明白，就用帕罩面。34 總是摩西入去耶和華面前 kap 伊講話，帕就掀起來，到伊出來。伊出來 ê 時，就將耶和華所吩咐 ê，kā 以色列人講。35 以色列人看見摩西 ê 面，摩西 ê 面射出光，摩西 koh 用帕罩面，thèng 候到伊入去 kap 耶和華講話帕就掀起來。

共同經課 - 2 詩篇九十九篇

1 耶和華做王，列邦 tiòh ngiàuh-ngiàuh-chhoah；伊坐 tī ki-lō 兵，地 tiòh 搖動。2 耶和華 tī 錫安做大；伊 poàⁿ 過 tī 萬百姓 ê 頂面。3 In tiòh o-ló 你大 koh thang 驚畏 ê 名；伊是至聖。4 王有氣力，歡喜公平；你 hō 正直堅固。Tī 雅各中行公平 kap 義理。5 Lín tiòh 尊重耶和華咱 ê 上帝，Tī 伊腳踏椅 ê 頭前跪拜；伊是至聖。6 Tī 伊 ê 祭司中，有摩西 kap 亞倫，Tī 求叫伊 ê 名 ê 人 ê 中間，有撒母耳；In 求叫耶和華，伊就聽 in。7 伊 tī 雲柱 ê 中間對 in 講話；In 遵守伊干證 ê 話，kap 伊所賞賜 in ê 律法。8 耶和華阮 ê 上帝 ah，你有應 in；你雖然照 in ê 所行報應 in，Iáu-kú 你是赦免 in ê 上帝。9 Lín tiòh 尊重耶和華咱 ê 上帝，Tī 伊 ê 聖山跪拜；因為咱 ê 上帝耶和華是至聖。

共同經課 - 3 哥林多後書三章十二節~四章二節

12 阮既然有 chit 號 ê ng 望，所以真好膽來講，13 無親像摩西用帕罩伊 ê 面，hō 以色列人 boē 得 thang 注目看到 hit-ê teh 衰退 ê 結局。14 但是 in ê 心變做硬；到 tī 今 á 日，in 讀舊約 ê 時，hit-ê 帕猶原 tī-teh，無掀開；chit-ê 帕 tùi 基督就廢棄。15 但是到今 á 日，不論甚麼時 in 讀摩西 ê 冊，帕 iáu-kú 罩 tī in ê 心。16 獨獨不論甚麼時 in 歸 ng 主，帕就除去。17 Taⁿ 主就是 hit-ê 神；主 ê 神 tī hit 位，hit 位就自由。18 咱眾人 ê 面無罩帕，親像鏡倒照主 ê 榮光，lóng 變化做伊 ê 像，tùi 榮光到榮光，親像 tùi 主，就是神，án-ni。1 所以阮既然有 chit-ê 職份，照所得 tiòh ê 憐憫，就無餒志。2 是有棄 sak 見笑 ê 暗事，無行 tī 詭譎，無混雜上帝 ê 道理，就是顯明真理，tī 上帝 ê 面前，將家己證明 tī ták 人 ê 良心。

共同經課 - 4 路加福音九章二十八節~三十六節(三十七節~四十三節)

28 講 chiah-ê 話了後差不多八日，耶穌帶彼得、約翰、雅各 saⁿ-kap 上山祈禱。29 祈禱 ê 時伊 ê 面貌有 koh-iūⁿ，伊 ê 衫白，koh 光 nà-nà。30 忽然有兩人 kap 伊講話，就是摩西、以利亞。31 In tī 榮光出現，談論伊 ê 過世，就是伊 tī 耶路撒冷所 beh 歷過 ê。32 彼得 kap 同 tī-teh ê 人厭倦眠去；到 in 精神，就看見耶穌 ê 榮光，以及 kap 伊 khiā-teh hit 兩人。33 當 hit 兩人離別伊 ê 時，彼得 tùi 耶穌講，先生，咱 tī chia 真好；阮來搭三間寮 á，一間 hō 你，一間 hō 摩西，一間 hō 以利亞；是 m̄知伊所講 ê。34 講 chiah-ê 話 ê 時，有雲罩 in；in 入 tī 雲內就驚。35 有聲 tùi 雲裡出，講，chit-ê 是我 ê Kiáⁿ，我所揀 ê；lín tiòh 聽伊 36 Hit-ê 聲已經出，就看見耶穌家己 tī-teh。學生靜靜；hit 時無將所看見 ê Kā 人講。37 隔日 in 落山 ê 時，有 kui 陣人來接伊 38 從中有一人大聲叫講，先生 ah，求你看我 ê Kiáⁿ，伊是我孤生 ê。39 有神掠伊，就 liām-piⁿ 喉叫，hō 伊 thiu-chhoah 到流 noā，koh 重重傷伊；離開伊實在 oh。40 我 bat 求你 ê 學生趕伊，也 in boē 能。41 耶穌應講，Hàiⁿ ah，m̄信 koh 悖逆 ê 世代 ah，我 kap lín toà，吞忍 lín，beh 到 joā 久 ah？Tiòh chhoā 你 ê Kiáⁿ 來 chia。42 來 ê 時鬼 siakhou7 伊倒，hō 伊大 thiu-chhoah。耶穌就責備邪神，醫好 hit-ê gín-ná，交 hō 伊 ê 老父。43 眾人 lóng gông-ngiáh 上帝 ê 大威嚴。眾人奇怪伊所做 lóng 總 ê 事，hit 時耶穌 tùi 伊 ê 學生講，